

**Leeter masa Pawl ma wuzlala  
ngeeme a  
Tesalawnik hay  
Mey da ray  
Leeter masa Pawl ma wuzlala  
ngeeme a Tesalawnik hay**

Leeter e keɗe, ara Pawl ma wuzlalatara a Tesalawnik hay. Ndəhay ga a wulkam ara ɗerewel mawuzlalakaya teesɗ da ray siya hay daa Mejəwey-mey Mawiya. Pawl a wuzlalamara leeter e na, ata bama ta ata Silas leŋ Timawte. Ara maja ngene, Pawl ma ləvey: «Ala, ala» dey weewe (1.1).

Tesalawnik na, ara berney masa ndəhay fa kam filaw ga da hwad a. Ara maja ngene, Jəwif hay ta ndəhay daa hwayak hay mekele mekele daa berney a daha. Masa Pawl aa daa berney a na, Jəwif hay siya ta təɓmara meesərkedey anga daa ba. Da ray ngene, mevel a catar, a wudam mey anga ba. Anda keɗe, ndəhay daa mecəmey-ray nga Yesu fetede, a səhwdamata ata Pawl ta Silas aa berney nga Bere ta tavad (SNM 17.10). Fa dəba ha, Pawl a daw a Aten.

Masa Pawl anga daa berney nga Aten na, ta', a slərda Timawte fa Tesalawnik hay amba a cəndərwa mey da ray menjey ata daa cəved nga Yesu (3.1-3). Timawte a vəhwa a hətfar Pawl da Kwarinti. A ləvar a Pawl, ndəhay da Tesalawnik fa təɓmara mey nga Yesu ma fəna ma fəna. Ta ngene he cəpa na, ndəhay a, a wulkam Yesu a da

vəhwa ta vara. Ndəhay ma məcam masa anğa ta vəhwa daa ba arañ na, a da diyam ama? Pawl ta mbədfatara la aa mey ata ha daa leeter e kefe daa fasəlawal 4 ta 5. Ama teesef na, a ləvtar a wudta kalah, a wudfey nğa hətatar fa dey saya (1.2–3.13). Asaya a vəltar gədan nğa njeý daa cəved nğa Yesu, nğa daw fa mey fa mey daa cəved e (4.1-12).

Daa leeter e kefe na, mey mekele mekele daha nğa vəley gədan a ndəhay:

Menjeý maaya ma mbafar a Gazlavay (4.1)

Yesu a vəhwa la (4.13–5.11)

Cek hay maaya masa ndəhay nğa Yesu ma da kamara (5.12-22)

Cek masa Gazlavay ma wudfey fa ndəhay (5.16-18)

### *Mecey-har*

<sup>1</sup> Ara yah, Pawl, ma wuzlala leeter kefe. Ala ta ata Silas lenj Timawte, ya camakwar har, akwar ndəhay daa Egəliz da Tesalawnik, akwar masa macəmkaya ta \*Gazlavay Papa aləkwa lenj ta Bay aləkwa Mahura \*Yesu \*Kəriste.

Anja Gazlavay nğa pəskwar mey, asaya nğa njadakwar daa zazay.

### *Pawl a kar suse a Gazlavay maja Tesalawnik hay*

<sup>2</sup> Daa masa ala fa dərəm danğay a Gazlavay na, ala fa wulkam da ray akwar mandaw mandaw,

ala fa kamar suse a Gazlavay maja akwar tabiya.

<sup>3</sup> Asaya, daa medərey-dangay ala a Gazlavay Papa aləkwa na, ala fa sərfadamara sləra masa akwar ma kamara, maja akwar fa pamara Yesu nga ndaw akwar fara fara. Ala fa sərfadamara akwar fa kam sləra ta gədanj maja ka wudmara Yesu, asaya, akwar fa pam lenjesl mandaw mandaw a ray cek masa ka sərmara ka hətam la ta fa Bay aləkwa Mahura Yesu \*Kəriste.

<sup>4</sup> Məlma adaw hay daa \*mecəmey-ray nga ndəhay nga Yesu, ya sərmara Gazlavay a wudkwar kalah, asaya, ta walakwar la nga key ndəhay anja hay.

<sup>5</sup> Sərmara daa masa ala fa wuzdamakwara \*Mey-maaya-mawiya na, mey a, a wusey fa akwar na, ara ta mey meeguzley daada ba, ama ta gədanj nga \*Mesəfney nga Gazlavay may. Mey masa ala maa guzldamara na, ya sərmara ara mey fara fara. Daa masa ala da wuzlah akwar na, ka sərmara menjey ala. Ya ta kam cek la nga jənkwar.

<sup>6</sup> Akwar na, akwar fa kam cek anda ala, asaya, akwar fa kam cek anda Bay Mahura Yesu. Akwar ta səram banay la ga, ama ka ta təbmara mey nga Gazlavay la cənga, ka təbmara ta meesəmey, meesəmey masa Mesəfney nga Gazlavay ma vəldakwara.

<sup>7</sup> Anda kefe, akwar fa kam cek maaya haa ndəhay nga Gazlavay tabiya da Masadəwan lenj

---

**1:2 1.2-3** 2.13; Fəl 1.3; Kwa 1.3; 2Tes 1.3; 2.13    **1:3 1.3** 5.1-2  
**1:4 1.4** 2Tes 2.13, 16    **1:5 1.5** 1Kwr 4.20    **1:6 1.6** SNM 17.5-9;  
 2Kwr 6.10; 2Tes 3.7, 9

da Akay a nəkam dey fa akwar, a kamara kəne.

<sup>8</sup> Fara fara mey nga Bay aləkwa Mahura a zlawā na, fa akwar haa a wusey fa ndəhay da Masadəwan leŋ da Akay. Asaya, kwa ndəhay daa wura, daa wura, fa cəndamara akwar fa təbmara mey nga Gazlavay. Da ray ŋgene, ala fa daa guzlmatar da ray metəbey-mey akwar na, daa saba,

<sup>9</sup> maja ndəhay a fa zəldamakwar sləmay, a ləvam akwar ta təbmandar la maaya maaya daa masa ala da wuzlah akwar. Asaya, a ləvam akwar ta mbəkdamara metey kuley sem amba ka səpam Gazlavay masa ta dey, Gazlavay masa fara fara.

<sup>10</sup> Anda keđe, akwar fa səkwmarā Bəzey ŋga Gazlavay ma da vəhwa da gazlavay da vad. Bəzey a na, ara Yesu masa Bay Gazlavay ma sləkfdərwā daa meməcey heyey. Ara ŋga ma da ka amba Gazlavay a ce y mevel a ray aləkwa ba ta pas masa Gazlavay ma da ka sariya.

## 2

*Mey da ray sləra ŋga Gazlavay masa Pawl ma ka da Tesalawnik*

<sup>1</sup> Məlma ala hay daa \*mecəmey-ray ŋga ndəhay ŋga Yesu, akwar ta ray akwar, ka səmra ala ma diyam fa akwar heyey na, ara ŋga tede ba.

<sup>2</sup> Asaya, ka səmra daa masa ala ma wusam fa akwar daa ba araŋ na, ndəhay daa berney ŋga Fəlepi ta sərdamandar banay la, ta cədmādar

la. Masa ala ma wusam la fa akwar na, ndəhay ga ta kam həma la a ray ala may. Ama Gazlavay ta vəldar gədan la, amba ya wuzdamakwara Mey anğa maaya mawiya cəngə.

<sup>3</sup> Masa ala fa wuzam mey da ray cəved maaya a ndəhay na, ya wuzdamara na, ta mēbərzley da hwad a daa ba, asaya, ala fa kam sləra ta mevel maaya, ala fa batam ndəhay daa ba.

<sup>4</sup> Ama Gazlavay ta sanğalandar la, ta səra la, ala ndəhay anğa hay fara fara. Anda kedə, ta vəldandara \*Mey-maaya-mawiya ha la amba ya wuzdamara a ndəhay. Maja nğene, yaa guzlam na, amba a mbafatar a ndəhay ba, ama amba a mbafar a Gazlavay ma səra mevel ala.

<sup>5</sup> Ka səmara daa masa ala da wuzlah akwar na, ala faa guzlam mey maaya maaya nğa mbafakwar nğa fəcmakwar daa ba, ala fa wulkam amba ya batam cek fa ndəhay na, daa ba. Mey masa ala ma kadamara, kwa Gazlavay na, a səra ara mey fara fara.

<sup>6</sup> Ala ta wudam amba kwa waawa a həlmandar na, daa ba. Kwa akwar, kwa ndəhay mekele, ala ta wudam amba ndaw a həlmandar na, daa ba.

<sup>7</sup> Ala na, ya gwamara nğa wey da ray akwar maja ala ndəhay meslərey nğa Yesu. Ama ala ta kamara kəne daa ba. Ala na, ndəhay meekwed-mey da wuzlah akwar anda maman maaya ma nəkey dey fa bəz anğa hay.

---

**2:2 2.2** SNM 16.19-24; 17.1-9    **2:3 2.3** 2Kwr 4.2    **2:4 2.4** Jer 11.20; 1Tm 1.11; Gal 1.10; Ef 3.2    **2:5 2.5** 2.10; SNM 20.33; 2Kwr 1.23    **2:6 2.6** Jan 5.41, 44

<sup>8</sup> Ala fa wudmakwar kalah. Da ray ngene, ala ta wuzdamakwara Mey-maaya-mawiya nga Gazlavay la. Ama ala ta meesəmey nga key cek mekele ma fəna saya. Ala ta meesəmey ga nga vəldamara kwa ray ala maja akwar, maja ala ta wudmakwar sem kalah.

<sup>9</sup> Məlma ala hay daa mecəmey-ray nga ndəhay nga Yesu, sləra masa ala ma kamara ta gədaŋ ta gədaŋ ngada akwar na, akwar fa sərfadamara, ba diya? Daa masa ala fa wuzdamakwara Mey-maaya-mawiya nga Gazlavay na, ala ta məskam vaw daa ba, ala ta kam sləra la taa vad, taa pas, amba ya njam fa har akwar ba.

<sup>10</sup> Daa masa ala da wuzlah akwar, akwar ndəhay ma təba mey nga Yesu na, menjey ala anga maaya na, maja ala fa jəkam sləmay si fa Gazlavay, ala fa kam cek ta cəved e, asaya, kwa ndəhay faa guzlam mey maaya ba da ray ala daa ba. Kwa akwar na, ka sərmara menjey ala. Gazlavay may, a səra.

<sup>11</sup> Asaya, ka sərmara ala ta kam cek la kwa ngada waawa da wuzlah akwar anda papaŋ ma key cek ngada bəz anga hay.

<sup>12</sup> Ala fa vəlmakwar gədaŋ, ala fa dəkmakwar mevel, asaya, ala faa guzlmakwar mandaw mandaw amba ka njam, ka kam cek anda Gazlavay ma wufey. Ara anga ma zəlkwar nga njey a wuzlah ndəhay masa anga fa wey da ray ata amba ka sərmara maaya anga.

<sup>13</sup> Yaw, ala fa kamar suse a Gazlavay mandaw mandaw saya na, maja daa masa ala fa

wuzdamakwara mey nga Gazlavay na, akwar ta jøkam sləmay la. Akwar ta təbmara mey a anda mey nga ndəhay magədan daa ba, ama ka təbmara na, anda mey nga Gazlavay. Fara fara mey a, ara mey nga Gazlavay. Mey a, a vəkwar gədan ngada akwar ndəhay nga Gazlavay.

<sup>14</sup> Məlma ala hay daa mecəmey-ray nga ndəhay nga Yesu, ndəhay akwar hay ta sərdamakwar banay la anda \*Jəwif hay ma sərdamata banay ta ndəhay daa Egəliz hay nga Gazlavay daa hwayak nga \*Jude. Anda keđe, akwar anda ndəhay ma təba mey nga Yesu \*Kəriste daa hwayak nga Jude he masa Jəwif hay ma sərdamata banay.

<sup>15</sup> Jəwif hay na, ta kədmata ndəhay ma təla mey nga Gazlavay la zleezle. Jəwif hay mekele hay ta kədmara Bay Mahura Yesu la vagay. Asaya, Jəwif hay mekele hay saya ta sərdamandar banay la may. Ndəhay a ngene, Gazlavay faa səmey da ray ata daa ba. Ata masa-gəra hay nga ndəhay tabiya.

<sup>16</sup> A təkmandar nga wuzey mey nga Gazlavay a ndəhay masa Jəwif hay ba hay, mey masa ma da ləhdata. Jəwif hay a, ata ta mebərey ga, ama ata fa kam mebərey mandaw mandaw a dey a, a dey a. Anda keđe, Gazlavay a bəsa mebərey ata ha saba, a cey mevel a ray ata, a katar sariya.

*Pawl a wuzey nga daw nga nəktərwa  
Tesalawnik hay saya*

---

**2:13 2.13** 1.2-3; Gal 1.11-12    **2:14 2.14** SNM 17.5    **2:15 2.15**  
SNM 2.23; 9.23, 29; 13.45, 50; 14.2, 5, 19; 17.5, 13; Rm 11.28; 2Kwr  
11.23-29    **2:16 2.16** Mt 23.31-33

<sup>17</sup> Məlma ala hay daa \*mecəmey-ray nga ndəhay nga Yesu, ala na, ta wudkam la ta akwar nga dər nekədey, ama mevel ala anğa ta akwar cəngə. Ala ta kam gədan la nga vəhey fa akwar, maja ala fa wudam nga hətmakwar fa dey saya.

<sup>18</sup> Ara maja ngene, ala ta wudam la nga vəhey fa akwar. Fara fara yah, Pawl, ta ray adaw, ya ta kədey vaw la dey weewe nga daw fa akwar, ama \*Satan ta təkndar sem.

<sup>19</sup> Ya wudam nga vəhey fa akwar na, maja akwar ndəhay masa ala fa pamara mewulkey ala a ray akwar, akwar ndəhay ma vəlmandar meesəmey, asaya, ara akwar ma da wuzdaman-dara ala ta kam sləra maaya la. Maja ngene, ya daa səmam fa mey nga Bay aləkwa Mahura Yesu ta pas masa anğa ma da vəhwa.

<sup>20</sup> Fara fara ala fa həlmamara Bay aləkwa Mahura maja akwar, asaya, ala faa səmam maja akwar.

### 3

<sup>1</sup> Masa ala ma cənam mey da ray akwar daa ba heyey na, ya gwamara nga bəsmara ba. Anda kede, ala ta wulkam la, maaya na, ya njam da Aten taava ala,

<sup>2</sup> ya slərdamara Timawte fa akwar. Timawte he na, ara məlma aləkwa daa mecəmey-ray nga ndəhay nga Yesu, ala ma kam sləra nga Gazlavay bama nga wuzey \*Mey-maaya-mawiya da ray \*Kəriste. Da ray ngene, ya ta slərdamara la fa



akwar nga jenkwar, asaya, nga vølkwar gødan daa mey nga Yesu.

<sup>3</sup> Ya slørdamara na, amba banay masa akwar ma sørmara na, a mbødda lengesl kwa nga waawa da wuzlah akwar ba. Akwar na, ka sørmara maaya maaya, banay hay a na, ara cek ma key daa menjey aløkwa, aløkwa ndøhay nga Gazlavay.

<sup>4</sup> Daa masa ala da wuzlah akwar na, ya ta løvmakwar la, ya da sørkwa banay. Ka sørmara fara fara banay a, ta wuswa la.

<sup>5</sup> Da ray ngene, daa masa ala ma gwamara nga vøhey fa akwar daa ba heyey na, ya gwamara nga bøsmara ba. Ta', ya slørda Timawte fa akwar amba ya cønda mey da ray akwar, da akwar fa tømbara mey nga Yesu cønga may kwa. Ya zlurey maja Sataj a da batakwar. Da ta batakwar sem na, sløra masa ala ma kamara da wuzlah akwar heyey na, a da tørey nga cek nga tede.

<sup>6</sup> Timawte ta daw la fa akwar, wure kede ta vøhwa cay fa ala. Taa guzldar mey maaya la da ray akwar, a løvey akwar ta gødan daa mey nga Yesu, asaya, akwar fa wudam vaw da wuzlah akwar. A løvey saya, akwar fa sørfadamandar maaya maaya cønga. Akwar fa wudam nga høtmandar saya anda ala ma wudam nga høtmakwar saya may.

<sup>7</sup> Mølma ala hay daa mecømey-ray nga ndøhay nga Yesu, ala fa søram banay kalah, ama daa

---

**3:2 3.2** Timawte: 1.1    **3:3 3.3** Ef 3.13; 2Tes 1.4; 2Tm 3.12    **3:4 3.4** SNM 14.22    **3:5 3.5** Føl 2.16    **3:6 3.6** SNM 18.5; 2Tes 1.3; 1Tm 1.5; Flm 5-7; Gal 5.6

masa ala ma cøndamara, akwar ta gødanj daa mey nga Yesu na, mey a ta vøldar gødanj la ga.

<sup>8</sup> Wure kefe, ala ta meesømey ma føna ma føna maja akwar fa tømara mey nga Bay Mahura ta mevel pal.

<sup>9</sup> Fara fara, ala faa sømam ga maja akwar. Ala fa kamar suse a Gazlavay, ama kwa ya kamar suse høma kwara na, suse ala ha a wusa ba.

<sup>10</sup> Ala fa døram dangay taa vad, taa pas mandaw mandaw ta mevel pal amba ya høtmakwar fa dey, asaya, amba yaa sørkadamakwar cek masa akwar ma sømara daa ba aranj da ray cøved nga Gazlavay.

<sup>11</sup> Anja Gazlavay Papa aløkwa ta ray anja lej Bay aløkwa Mahura Yesu nga wurmandara cøved amba ya diyam fa akwar.

<sup>12</sup> Asaya, anja Bay aløkwa Mahura nga ka amba ka wudam vaw da wuzlah akwar ma føna ma føna, asaya, amba ka wudmata ndøhay tabiya anda ala ma wudmakwar may.

<sup>13</sup> Anja Bay aløkwa Mahura nga vølkwar gødanj amba cek malamba a njey aa mevel akwar ba, asaya, amba ta pas masa anja ma da vøhwa a bøla ta ndøhay anja hay na, akwar ndøhay maaya manjar mebørey fa mey nga Gazlavay Papa aløkwa.

## 4

*Mey da ray menjey maaya ma mbafar a Gazlavay*

<sup>1</sup> Məlma ala hay daa \*mecəmey-ray nga ndəhay nga Yesu, wure keđe ya wudam ngaa guzlmakwar da ray cek mekele. Zleezle na, ala taa sərkađamakwar la da ray menjey maaya ma mbafar a Gazlavay. Fara fara menjey akwar a, aa kəne. Ama wure keđe, ala faa cəfdamakwar ta mezəley nga Bay Mahura Yesu, ala faa cəfdamakwar ta mevel pal amba ka səpam menjey maaya ma mbafar a Gazlavay ma fəna ma fəna.

<sup>2</sup> Ala taa sərkađamakwar la da ray cek hay nga key, maja ara Bay Mahura Yesu ma pandar ngaa sərkađa. Ka sərmara cek hay masa ala maa sərkađamakwara ha, ba diya?

<sup>3</sup> Gazlavay a wudəy na, ka təram ndəhay manjar mebərey, ka da lam vaw saw ba.

<sup>4</sup> Maaya na, kwa waawa da wuzlah akwar a səra nga njeý maaya maaya ta ngwas anga anda Gazlavay ma wudəy, amba ndəhay aa guzlam maaya ba da ray menjey akwar ba.

<sup>5</sup> Ka da səpam nga key cek malamba ba. Ma kam cek anda ngene na, ara ndəhay ma sərmara Gazlavay ba.

<sup>6</sup> Da ray mey a keđe na, ndaw a da kar cek maaya ba a məlmaha ba, a da bata ba sələk, maja Bay aləkwa Mahura a da sərdata banay ta ndəhay ma kam cek malamba anda ngene. Ala ta kətmakwar la zleezle da ray cek aha.

<sup>7</sup> Yaw, Gazlavay ta zəndakwar nga key cek hay malamba daa ba, ama a zəndakwar na, amba ya tərkwə ndəhay maaya fa mey anga.

<sup>8</sup> Ndaw ma rəsa mey a keɗe na, a rəsey ŋgene na, ndaw ba, ama a rəsey Gazlavay ma wəlkwar Mesəfney anɓa. Mesəfney anɓa ha na, maaya, manjar mebərey.

<sup>9</sup> Akwar fa wuɗam vaw da wuzlah akwar. Da ray ŋgene, ala fa da wuzlalamakwar da ray mewuɗey-vaw na, daa saba, maja Bay Gazlavay taa sərkaɗakwar cay ŋga wuɗey vaw da wuzlah akwar.

<sup>10</sup> Fara fara, akwar fa wuɗam vaw da wuzlah akwar, akwar fa wuɗmata ndəhay ŋga Yesu tabiya masa daa hwayak ŋga Masadəwan. Məlma ala hay daa mecəmey-ray ŋga ndəhay ŋga Yesu, ya kamakwar ambahw amba ka wuɗam vaw ma fəna ma fəna saya.

<sup>11</sup> Asaya, kam gəɗanɗ amba ka njam daa zazay, amba kwa waawa a nəkey dey fa sləra masa fa mey anɓa, amba kwa waawa a zəmey cek si ta fa mawurbay anɓa, anda ala ma kətmakwar zleezle.

<sup>12</sup> Da akwar fa kamara kəne na, ndəhay ma təba mey ŋga Yesu ba a namakwar ray la. Asaya, akwar fa da rəkam cek fa ndəhay daa ba.

*Mey da ray pas masa Bay Mahura Yesu ma da vəhwa*

<sup>13</sup> Məlma ala hay daa \*mecəmey-ray ŋga ndəhay ŋga Yesu, ya wuɗam ka sərmara cek ma da key da ray ndəhay ŋga Yesu maməctakaya amba ka təwam anda ndəhay mekele ba.

Ndohay mekele he na, fa pam lengesl nga hotey heter nga njeɣ ta Yesu nga sɛrmataw daa ba.

<sup>14</sup> Ya sɛrkwa Yesu ta mɛceɣ sem, fa dɛba ha, ta slɛkɔdawa sem daa memɛceɣ. Da ray ngene, sɛrmara fara fara ndohay nga Yesu mamɛctakaya na, Gazlavay a slɛkɔɔadaterwa la daa memɛceɣ amba a njam ta Yesu a.

<sup>15</sup> Mey masa ala ma daa guzlmakwar wure keɔe na, ara mey masa Bay Mahura Yesu maa sɛrkadatar a ndohay. Mey a, a lɔvey, ta pas masa Yesu ma da vɛhwa a bɛla na, alɛkwa masa ta dey da bɛla keɔe, alɛkwa fa da nakwa teesɛɔ da ray ndohay mamɛctakaya nga ceɣ ray ta anɣa daa ba.

<sup>16</sup> Anda melɔvey, ta pas ngene, Gazlavay aa guzɣwa la ta gɛɔanɣ. Maslanɣ anɣa mahura a wudeɣ la ta gɛɔanɣ, ɔɣay nga taalam nga Gazlavay a cɛnwa la. Fa dɛba ha, Bay alɛkwa Mahura Yesu ta ray anɣa, a pawa salay da vadɔ. Ndohay anɣa hay mamɛctakaya na, a slɛkɔɔamawa la daa memɛceɣ teesɛɔ,

<sup>17</sup> fa dɛba ha, alɛkwa masa ta dey na, Gazlavay a hɛlnɔɔakwar la ta ndohay mamɛctakaya heyey aa mekwtene, amba ya cakwa ray ta Yesu daa memɛɔ da vadɔ. Anda keɔe, ya da njakwa nga sɛrmataw ta Bay alɛkwa Mahura Yesu.

<sup>18</sup> Maja ngene, dɛkam mevel da wuzlah akwar ta mey a keɔe.

---

**4:13 4.13** 1Kwr 15.18-19; Ef 2.12      **4:13 4.13-17** 5.1-2; 1Kwr 15.51-52      **4:14 4.14** Rm 14.9; 1Kwr 15.3-4, 12, 20      **4:15 4.15** 1Kwr 7.10, 25      **4:16 4.16** 1Kwr 15.23      **4:17 4.17** Janɣ 12.26; Rm 5.17; Fɛl 3.20

## 5

*Ma da ñiyey vaw nga səkwey Yesu ma da vəhwa na, kwara?*

<sup>1</sup> Məlma ala hay daa \*mecəmey-ray nga ndəhay nga Yesu, mey da ray pas masa Yesu ma da vəhwa na, ala fa da wuzlalamakwar da ray a daa ba,

<sup>2</sup> maja akwar ta ray akwar, ka sərmara pas masa Yesu ma da vəhwa na, a sərey ba, aŋga anda pas masa ndaw-mayal ma da mbəzey a way ndaw ta tavaɗ ma sərey ba.

<sup>3</sup> Da masa ndəhay fa ləvam: «Ala daa zazay, cek ma da hətfandar daa ba» na, ŋgene, banay a da sawa a ray ata dərɤafay anda hwaɗ ma car ŋgada ŋgwas ma da yawa. Ndəhay ma wulkam anda ŋgene na, fa da ləham daa ba səlak.

<sup>4</sup> Ama, akwar, məlma ala hay daa mecəmey-ray nga ndəhay nga Yesu na, akwar ndəhay masa ma njam daa ləvaŋ ba. Da ray ŋgene, pas masa Yesu ma da vəhwa na, fa da hətfakwar dərɤafay anda ndaw-mayal ma hətfey ndaw na, daa ba.

<sup>5</sup> Akwar tabiya na, ndəhay ma njam daa slam-mewedey, ma səkwmarara pas nga Yesu ma da vəhwa. Aləkwa ndəhay ma njam daa ləvaŋ ba, asaya, aləkwa ndəhay nga tavaɗ ba.

<sup>6</sup> Maja ŋgene, ya da njakwa anda ndəhay mekele ba. Ya da nakwa ɗar ba, ama njakwa ta mewey vaw, asaya, pakwa lenɟesl fa ray aləkwa.

---

**5:2 5.2** 1.2-3, 10; 2.19; 3.13; 5.23; Mt 24.36; Fəl 4.5; 2Tes 1.7, 10; 2.1-2; **anda pas masa ndaw-mayal ma sawa:** Mt 24.43; 2Pi 3.10; CWJ 3.3; 16.15 **5:3 5.3** Jer 6.14-15; Mt 24.39 **5:5 5.5-8** Rm 13.11-12; Ef 5.8-9

<sup>7</sup> Ndøhay a nam na, ta tavad. Ndøhay a sam wuzam, a wam na, ta tavad may.

<sup>8</sup> Ama aløkwa na, ndøhay ma sækwmara pas nga Yesu ma da vøhwa. Da ray ngene, pakwa lenjesl fa ray aløkwa. Njakwa mandaw mandaw daa metøbey-mey nga Yesu, asaya, wudkwa vaw da wuzlah aløkwa. Menjey anda kede na, ara anda ndaw ma børdä dadak anga ta zana nga børey nga key vøram. Pakwa lenjesl fa meløhey masa aløkwa ma høtkwa ta fa Yesu. Mepey lenjesl fa meløhey a na, ara anda ndaw ma pey jikwew nga børey ngadaa vøram.

<sup>9</sup> Yaw, Gazlavay a walandakwar na, amba a sørdandakwar banay ba. Ama a walandakwar amba a løhdandakwar ta fa Bay aløkwa Mahura Yesu \*Køriste.

<sup>10</sup> Yesu Køriste he ta møcey la maja aløkwa amba ya njakwa daa slam a ta anga. Pas masa aa ma da vøhwa, kwa aløkwa ta dey, kwa aløkwa mamøctakaya na, ya njakwa la daa slam a ta anga.

<sup>11</sup> Da ray ngene, vølam gødan da wuzlah akwar, jønäm vaw da wuzlah akwar nga tøbey mey nga Yesu ma føna ma føna anda akwar ma kamara wure kede.

### *Mey nga madagway-dakw*

<sup>12</sup> Mølma ala hay daa \*mecømey-ray nga ndøhay nga Yesu, ya kamakwar ambahw, namatar ray a ndøhay ma kam sløra nga Gazlavay da wuzlah akwar. Ata na, ara ndøhay masa Bay Mahura ma pata nga \*bay-ray hay da wuzlah

akwar, amba a kətmakwar ŋga səpey cəved  
aŋga.

<sup>13</sup> Namatar ray maaya maaya, asaya, wudmata  
maja ata fa kam sləra ŋga Gazlavay. Njam ta  
zazay da wuzlah akwar.

<sup>14</sup> Məlma ala hay daa mecəmey-ray ŋga  
ndəhay ŋga Yesu, ya kamakwar ambahw,  
kətmata masa-mayad hay, vəlmatar gədaŋ a  
ndəhay masa ta mandərzay daa dey, jənmata  
ndəhay masa-bəle daa mey ŋga Gazlavay.  
Bəsmata ndəhay tabiya.

<sup>15</sup> Wam vaw! Da ndaw a kakwar cek maaya ba  
na, ka da kamar cek maaya ba kəne ba. Ama daa  
menjey akwar na, kam gədaŋ mandaw mandaw  
amba ka kam cek hay maaya da wuzlah akwar,  
asaya, amba ka kam cek maaya ŋgada ndəhay  
tabiya.

<sup>16</sup> Njam mandaw mandaw daa meesəmey.

<sup>17</sup> Dəram daŋgay a Gazlavay mandaw man-  
daw, ka da gəram ba.

<sup>18</sup> Kamar suse a Gazlavay, kwa daa meeme  
cəpa, maja a wudəy amba akwar ndəhay ŋga  
Yesu \*Kəriste na, ka kamara kəne.

<sup>19</sup> Ka da təkmarə sləra ŋga \*Mesəfney ŋga  
Gazlavay ba.

<sup>20</sup> Ka da rəsmara mey hay ŋga ndəhay ma təla  
mey ŋga Gazlavay ba.

<sup>21</sup> Saŋgalamata mey hay a maaya maaya  
daŋgay. Da mey hay a, a samawa ta fa Gazlavay

---

**5:12 5.12** 1Kwr 16.15-18; 1Tm 5.17    **5:14 5.14** 2Tes 3.6, 11, 15  
**5:15 5.15** Rm 12.17; Fəl 1.10    **5:16 5.16** Fəl 4.4    **5:17 5.17**  
5.25; Lk 18.1; Rm 12.12; Ef 6.18; Kwa 4.2    **5:18 5.18** Ef 5.19-20  
**5:19 5.19** Ef 4.30



fara fara na, ηgene, təbmara mey hay a, aa mevel akwar.

<sup>22</sup> Ka da kam cek malamba ba səlak.

<sup>23</sup> Anja Gazlavay ta ray anğa, ndaw ma njadata ndəhay daa zazay, ηga ka amba ka tərām ndəhay manjar mebərey, ηga jəda mesəfney akwar, heter akwar, ta vaw akwar cəpa maaya maaya, amba ta pas masa Bay aləkwa Mahura Yesu Kəriste ma da vəhwa na, a hətfakwar manjar mebərey.

<sup>24</sup> Gazlavay ma zəlkwār ηga njeγ ta anğa na, a ndəvda sləra ha la fara fara, maja cek masa anğa ma ləvey a ka la na, a ka la.

<sup>25</sup> Məlma ala hay daa mecəmey-ray ηga ndəhay ηga Yesu, dərām dangay a Gazlavay maja ala may.

<sup>26</sup> Camatar har maaya maaya a məlmanη hay daa mecəmey-ray ηga ndəhay ηga Yesu tabiya.

<sup>27</sup> Ya kakwar ambahw ta mezəley ηga Bay Mahura, jangamara leeter keɖe fa mey ηga ndəhay ηga Yesu tabiya.

<sup>28</sup> Anja maaya ηga Bay aləkwa Mahura Yesu Kəriste ηga njeγ ta akwar.

---

**5:21 5.21** 1Kwr 14.29; Ef 5.10; 1Jη 4.1      **5:23 5.23** 5.1-2; 2Kwr 13.11      **5:24 5.24** 1Kwr 1.8-9; Fəl 1.6; 2Tes 3.3      **5:25 5.25** 1.2-3; Rm 15.30      **5:26 5.26** Rm 16.16      **5:27 5.27** Kwa 4.16

**Mofu-Gudur**  
**The New Testament in the Mofu-Gudur language of**  
**Cameroon: Mejəwey-mey Mawiya**  
**Le Nouveau Testament en langue Mofu-Gudur**  
**(Cameroun)**

copyright © 2007 Wycliffe Bible Translators, Inc.

Language: Mofu-Gudur

Contributor: Aramaic Bible Translation, Inc.

All rights reserved.

2025-05-14

---

PDF generated using Haiola and XeLaTeX on 14 May 2025 from source  
files dated 14 May 2025

2b021919-36cf-59da-a35f-10c5e5548811